



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 1422 / prot.
2

Tiranë më 26.12.2017

REKOMANDIM

Nr. 58 , datë 26.12.2017

MBI

ZBATIMIN E LIGJIT PËR MBROJTJEN E TË DHËNAVE PERSONALE.

Baza Ligjore: Ligji Nr. 9887 datë 10.03.2008 "*Për Mbrojtjen e të Dhënave Personale*" i ndryshuar, nenet 30, 31 dhe 32 të tij.

Ligji Nr. 44/2015 "*Kodi i Procedurave Administrative të Republikës së Shqipërisë*".

Në zbatim të Urdhrit nr. 274 datë 25.10.2017 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë Institucionit të Ekzekutimeve të Vendimeve Penale (I.E.V.P.) "*Lushnjë*" me objekt kontrolli:

- Zbatimi i Ligjit Nr. 9887 datë 10.03.2008 "*Për mbrojtjen e të dhënave personale*" i ndryshuar dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të I.E.V.P. "*Lushnjë*".

Institucioni i Ekzekutimeve të Vendimeve Penale "*Lushnjë*" është institucion varësie i Drejtorisë së Përgjithshme të Burgjeve dhe ka për qëllim garantimin e masave të sigurisë, realizimin e trajtimit të të dënuarve, zbatimin e programeve të rehabilitimit dhe rintegritimit, zbatimin e politikave shëndetësore si dhe detyrimet e tjera që rrjedhin nga aktet ligjore dhe nënligjore në fuqi. I.E.V.P. "*Lushnjë*" është kategorizuar si burg i sigurisë së zakonshme.

Drejtoria e Hetimit Administrativ, gjatë kryerjes së veprimeve procedurale, u asistua nga përfaqësuesit e I.E.V.P. "*Lushnjë*", të cilët ishin njohur me Urdhrit e Komisionerit për kryerjen e hetimit administrativ.

Gjatë hetimit administrativ të ushtruar dhe pas shqyrtimit të dokumentacionit të paraqitur nga përfaqësuesit e I.E.V.P. "*Lushnjë*", është konstatuar:

1. Në dosjet e personelit civil dhe të punonjësve të policisë së burgut konstatohet se ka dokumenta të tepërta referuar nenit 17 të Ligjit nr. 10032 datë 11.12.2008 "*Për Policinë e Burgjeve*", nenit 27 të Rregullores "*Për përcaktimin e rregullave dhe procedurave për marrëdhënien e punës, trajnimin, ecurinë në karrierë dhe dhënien e*

masave disiplinore për punonjësit e policisë së burgjeve” miratuar me Urdhër nr. 3125/1 datë 4.9.2009 të Ministrit të Drejtësisë. Dokumenta të tepërta janë: dokumenta të vjetra të periudhës para-viteve 90 në përmbajtje të të cilit ka informacione mbi gjendjen moralo-politike të individit, dokument me të dhëna “sensitive” të nëpunësit “*Çertifikata shëndetësore për punonjësit*” e detajuar, “*Dëshmi Penaliteti*”, vlerësime pune, urdhra për masa disiplinore të viteve të kaluara, dokument për marrjen e lejes së zakonshme të viteve të shkuara etj.

Konstatimi përbën shkelje administrative të Kreut II (Përpunimi i të dhënave personale) të Ligjit Nr. 9887 datë 10.03.2008 “*Për Mbrojtjen e të Dhënave Personale*” i ndryshuar.

2. Nga verifikimi i ambienteve në të cilat I.E.V.P. “*Lushnjë*” ushtron aktivitetin si hyrjet, ambienti i vizitorëve, korridoret e administratës etj., është konstatuar se ato janë të mbikëqyrura nëpërmjet sistemit të video-vëzhgimit (CCTV). Gjatë verifikimit në vend, është konstatuar se disponohen rregullore, udhëzime dhe procedura të mirëfillta për sistemin e video-vëzhgimit (CCTV) pavarësisht se të dhënat “*imazhe-video*” nuk trajtohen në kuadër të Ligjit nr. 9887 datë 10.03.2008 “*Për Mbrojtjen e të Dhënave Personale*” i ndryshuar. Zyra e Komisionerit ka konstatuar se I.E.V.P. “*Lushnjë*” informon nëpërmjet tabelave subjektet e të dhënave “*vizitorë*” dhe “*punëmarrës*”, mbi përpunimin e të dhënave personale “*imazhe-video*” me anë të sistemit të Video-Vëzhgimit (CCTV), ndonëse ato nuk janë sipas modelit standard të miratuar nga Zyra e Komisionerit.

Zyra e Komisionerit ka miratuar nëpërmjet Udhëzimit nr. 3 datë 05.03.2010 “*Mbi përpunimin e të dhënave personale me sistemin e video survejimit në ndërtesa dhe mjedise të tjera*” modelin standard të tabelës informuese, duke ju vënë në dispozicion kontrolluesve një mekanizëm standard për t’ju mundësuar subjekteve të të dhënave informimin mbi prezencën e sistemit të video-vëzhgimit CCTV si dhe ushtrimin e të drejtave të tyre në raste cënimi.

Konstatimi përbën shkelje administrative të nenit 18 të Ligjit: “*Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t’i përpunojë të dhënat, për mënyrën e përpunimit, përveç rastit kur subjekti i të dhënave është në dijeni të këtij informacioni. Kontrolluesi duhet të informojë subjektin e të dhënave për të drejtën për akses, si dhe të drejtën për korrigjim të të dhënave të tij.*”.

3. Nga verifikimi i dokumentacionit personal të punësimit të personelit civil dhe policor, është konstatuar se I.E.V.P. “*Lushnjë*” nuk ka marrë masa për “*ruajtjen e konfidencialitetit*” nga punëmarrësit të cilët, për shkak të detyrës dhe përshkrimit të pozicionit të punës, kanë akses në mbledhjen, përpunimin, ruajtjen dhe sigurinë e të dhënave personale.

Zyra e Komisionerit ka miratuar nëpërmjet Vendimit nr. 6 datë 05.08.2013 “*Për përcaktimin e rregullave të hollësishme për sigurimin e të dhënave personale*” modelin standard të “*Deklaratës së Konfidencialitetit*”, duke u mundësuar kontrolluesve një mekanizëm për të angazhuar nëpunësit në “*ruajtjen e konfidencialitetit*” në lidhje me të dhënat që ata aksesojnë.

Konstatimi përbën shkelje administrative të nenit 28 të Ligjit nr. 9887 datë 10.03.2008 *"Për Mbrojtjen e të Dhënave Personale"* i ndryshuar: *"Kontrolluesit, përpunuesit dhe personat, që vihen në dijeni me të dhënat e përpunuara, gjatë ushtrimit të funksioneve të tyre, detyrohen të ruajnë konfidencialitetin dhe besueshmërinë edhe pas përfundimit të funksionit. Këto të dhëna nuk përhapen, përveç rasteve të parashikuara me ligj"*.

Konstatimet e mësipërme në tërësinë e tyre përbëjnë tejkalim të mbledhjes së informacionit të kërkuar në zbatim të Ligjit nr. 10 032/2008 *"Për policinë e burgjeve"*, Rregullores *"Për përcaktimin e rregullave dhe procedurave për marrëdhënien e punës, trajnimin, ecurinë në karrierë dhe dhënien e masave disiplinore për punonjësit e policisë së burgjeve"* miratuar me Urdhrin nr.3125/1 datë 4.9.2009 të Ministrit të Drejtësisë, Ligjit nr. 9887 datë 10.03.2008 *"Për Mbrojtjen e të Dhënave Personale"* i ndryshuar dhe Udhëzimit nr. 24 të Komisionerit datë 27.12.2012 *"Për detyrimet e kontrolluesve përpara se të përpunojnë të dhëna personale"*.

Në përfundim të kontrollit administrativ, referuar provave dhe konstatimeve në vend, grupi i kontrollit ka mbajtur procesverbalin të cilin e lexoi në prani të përfaqësuesit të I.E.V.P. *"Lushnjë"*, i cili e nënshkroi duke mos paraqitur pretendime.

Në zbatim të neneve 87-89 të Ligjit nr. 44/2015 *"Kodi i procedurave Administrative të Republikës së Shqipërisë"* dhe në respektim të së drejtës për tu dëgjuar sa i përket shkeljeve të konstatuara, Zyra e Komisionerit ka organizuar një seancë dëgjimore në të cilën është ftuar I.E.V.P. *"Lushnjë"* dhe Drejtoria e Përgjithshme e Burgjeve si organ epror. Deri në ditën e zhvillimit të seancës dëgjimore I.E.V.P. *"Lushnjë"* nuk kishte rikuperuar shkeljet e konstatuara.

Në përfundim të procesit të hetimit administrativ, Zyra e Komisionerit mban në konsideratë faktin që kontrolluesi ka qenë në bashkëpunim serioz me grupin e kontrollit gjatë hetimit administrativ.

Sa më sipër:

Në zbatim të neneve 5, 6, 18, 28, 29, 30, 31 dhe 32/1 të Ligjit Nr.9887 datë 10.03.2008 *"Për Mbrojtjen e të Dhënave Personale"* i ndryshuar,

REKOMANDOJ:

1. Kontrolluesi I.E.V.P. *"Lushnjë"*, në zbatim të nenit 5 dhe 6 të Ligjit Nr.9887 datë 10.03.2008 *"Për Mbrojtjen e të Dhënave Personale"* i ndryshuar, të përditësojë ku është e nevojshme dhe ti rikthejë subjekteve të të dhënave *"punëmarrës"* dokumentat e tepërta të cilat ndodhen në dosjet personale të tyre, në mënyrë që përmbajtja e dosjeve të jetë në përputhje me parashikimet në nenin 17 të Ligjit nr. 10032 datë 11.12.2008 *"Për Policinë e Burgjeve"* dhe nenit 27 të Rregullores *"Për përcaktimin e rregullave dhe procedurave për marrëdhënien e punës, trajnimin, ecurinë në karrierë dhe dhënien e masave disiplinore për punonjësit e policisë së burgjeve"* miratuar me Urdhrin nr. 3125/1 datë 4.9.2009 të Ministrit të Drejtësisë.
2. Kontrolluesi I.E.V.P. *"Lushnjë"*, në zbatim të nenit 18 të Ligjit Nr.9887 datë 10.03.2008 *"Për Mbrojtjen e të Dhënave Personale"* i ndryshuar, të standartizojë

tabelat informuese për subjektet e të dhënave në lidhje me informimin mbi prezencën e sistemit të video-vëzhgimit (CCTV) si dhe ushtrimin e të drejtave të tyre në raste cënimi, sipas modelit standard të miratuar nga Komisioneri nëpërmjet Udhëzimit nr. 3 datë 05.03.2010 "Mbi përpunimin e të dhënave personale me sistemin e video survejimit në ndërtesa dhe mjedise të tjera";

3. Kontrolluesi I.E.V.P. "Lushnjë", në zbatim të nenit 28 të Ligjit Nr.9887 datë 10.03.2008 "Për Mbrojtjen e të Dhënave Personale" i ndryshuar, të marrë masa për ruajtjen e konfidencialitetit nëpërmjet nënshkrimit të "Deklaratës së Konfidencialitetit" nga punëmarrësit të cilët, për shkak të detyrës dhe përsëritimit të pozicionit të punës, kanë akses në mbledhjen, përpunimin, ruajtjen dhe sigurinë e të dhënave personale.
4. Në zbatim të nenit 32/1 të Ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar, I.E.V.P. "Lushnjë" të kryejë plotësimin e detyrimeve të parashikuara në këtë Rekomandim brenda afatit 30 ditor nga momenti i marrjes dijeni, dhe të njoftojë me shkrim pranë Komisionerit për të Drejtën e Informimit dhe Mbrojtjen e të Dhënave Personale për masat e marra. Plotësimi i këtyre detyrimeve ligjore mund të jetë objekt kontrolli në vazhdimësi nga Zyra e Komisionerit.
5. Në rast mos përmbushje të këtyre detyrimeve, Komisioneri vepron sipas pikës 2 të nenit 30 të Ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të Rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 26.11.2017

KOMISIONERI

Besnik Dervishi

